


咸豐柒年重刻

羅田萬密齋先生集  
平原趙熙齋先生校

# 痘疹心法



四川資州署藏板



痘疹心法原序



說者曰醫者意也小兒有  
病口不能言察脉窮變盈  
縮增減要之在人譬之名  
將用兵因地制形緣機利

用化裁通變存乎此心奚  
而曰顓顓乎古方冊也矧  
小兒痘疹之病虛虛實實  
紛然其間奚可勝載亦焉  
能一而投也余折其中不

然夫兵與醫家者流雖難  
專執固泥然大都無踰攻

守兩端溫補保元是兵家

守之類也涼瀉解毒是兵

家攻之類也智者察於形

色榮衛之間審於虛實邪  
正之辯而苟取古今方局  
斷案時出而劑量焉豈不  
足以通神明而稱工巧拯  
顛危而保赤子哉是仁人

君子之所學而汲也矧偏  
隅荒僻之壤疫癘流行之  
候小兒倉卒受病雖薑薯  
藥術草木之具且猶弗給  
尙奚望乎神聖明哲之理

乎乃天閼短折世常有焉  
余每憾之癸亥承乏兩淮  
見庫貯前賢嵩螺彭公所  
梓痘疹書板公餘之暇命  
工刷印細加繙閱受其應

變制宜貫綜該括徹乎輕  
重吉凶氣色清濁男女大  
小可以保嬰可以奪造化  
之權誠幼幼之金丹生生  
之水火也惜乎篇帙殘缺

亟覓舊本重刊補焉亦曰  
痘疹之病爲小兒第一生  
死關頭期以布之天下庶  
臨病應變因時酌宜叅詳  
審諦可以收萬全之效敢

謂功與嵩、鵬等哉

康熙二十六年丁卯仲春


上浣吉日

賜進士第大 中大夫總理兩

淮江廣河南等處鹽法道

前中憲大夫知揚州府事

平山崔華撰



痘疹心法序



痘疹心法一書板藏淮揚齋庫  
中往歲先大父文敏公撫吳  
家君於友人處得之愛其論症  
精詳立方明備誠痘科中之寶  
筏慈航也攜歸都門者有年戊

申秋余出宰西川家君手持  
此書授余云長孫為余鍾愛尚  
未出花汝可留此以備他日參  
攷余受而置之笥中者已十載  
矣丙辰冬兩兒先後出痘次者  
雖重而順長兒點見忽隱群醫

相顧傍徨余心憂之爰檢此帙  
悉心查閱自催漿以至結痂均  
依方用藥應手奏効乃得化險  
為平余感神天之默佑也馳稟  
都門家君欣喜逾常亦郵書  
慶慰並勗勉者備至余念治痘

之書不下數十種此編為蜀郡  
所無不謂得之於數十年前  
攜之於數千里之外而兩兒之  
疴竟賴此獲痊豈非祖宗福蔭  
慶及子孫之明驗歟余不敢秘  
為家珍特以原本付梓用廣流

傳非曰能讀父書亦以見兩世  
德澤所留貽者竊欲由近及遠  
俾椿庭愛日以慈幼而益慶縣  
長斯誠余之深幸也若云推已  
及人誠求保赤則余又遜謝不  
遑已是為序

咸豐七年歲在丁巳清和月上  
浣四川資州直隸州知州長  
白覺羅恒保撰

